



# **FONO AOA O FAITULAFONO.**

## **LIPOTI A LE KOMITI O TUPE MAUA MA TUPE TOTOGI**

**I LE**

**P.P. 2014/2015 Nu. 157,**

**TALA FAATATAU FAAOPOOPO MUAMUA O TUPE A  
SAMOA MO LE TAUSAGA FAALETUPE E  
FAAIUINA ASO 30 IUNI 2015.**

**(Tuuina atu i le Fono Aoa o Faitulafono)**

## 1. **FAUTUAGA**

**Ua fautuaina e le Komiti o Tupe Maua ma Tupe Totogi le Fono Aoao ina ia faautagia lana Lipoti.**

## 2. **FAATOMUAGA:-**

O le Komiti o Tupe Maua ma Tupe Totogi o lo o faavaeina i lalo o aiaiga o Tulafono Tumau 170 ma e aofia ai:-

### **SUI USUFONO**

### **Filifilia**

Susuga Hon PAPALITELE Niko Lee Hang	-	Taitaifono	30/5/2011
Afioga TAFUA Maluelue Tafua	-	Sui Taitaifono	30/5/2011
Afioga Hon PALUSALUE Faapo II	-	Sui Usufono	30/5/2011
Tofa LEALAILEPULE Rimoni Aiafi	-	Sui Usufono	30/5/2011
Afioga TIALAVEA F Tionisio Seigafolava	-	Sui Usufono	30/5/2011
Afioga AFUALO Dr Wood Uti Salele	-	Sui Usufono	30/5/2011
Afioga TAEFU Lemi Taefu	-	Sui Usufono	30/5/2011
Afioga Hon FAUMUINA Tiatia F Liuga	-	Sui Usufono	18/8/2014

## 3. **TULAFONO TUMAU 170:-**

E tusa ai ma aiaiga o le Tulafono Tumau 170, o le a avea ma tiute o le Komiti o Tupe Maua ma Tupe Totogi:-

- **Le Iloiloina o so o se tulafono Tau Faaofi, Talosaga po o nisi mataupu ua tuuina atu i ai e le Fono Aoao e tusa ai o Tulafono Tumau ma Tala Faatatau o Tupe po o le toe Iloiloga o le faatinoga o galuega a Matagaluega;**
- **Le faasoia atu i so o se Komiti Filifilia na te faatinoina suesuega o so o se Tala Faatatau o Tupe ma so o se iloiloga o le faatinoga o galuega a Matagaluega, ma ia manaomia lea Komiti Filifilia ina ia toe lipoti atu i le Komiti a o le'i tuuina atu lana Lipoti i le Fono Aoao;**
- **Le suesueina o Faiga Faavae, faafoega ma Tupe Alu a Matagaluega ma Faalapotopotoga a le Malo e faasino i Tupe a le Malo**
- **Le tuuina atu o Fautuaga i le Fono Aoao i so o se fesuiaiga e ono fuafuaina ua manaomia i le Tala Faatatau o Tupe Faaletausaga.**

#### 4. OTOOTOGA O TUPE FAATATAUINA.

	<b>2014/2015</b>	<b>Tala Faatatau Faaopoopo</b>	<b>Tala Autu &amp;</b>
	<b>Tala Faatatau Autu</b>	<b>Muamua 2014/2015</b>	<b>Tala Faatatau</b>
			<b>Faaopoopo Nu.1</b>
<b><u>TUPE MAUA</u></b>	<b>\$m</b>	<b>\$m</b>	<b>\$m</b>
Tupe Maua Masani	544,910,258	8,306,528	553,216,786
Tupe Faameaalofa mai Fafu	178,051,950	-	178,051,950
<b>Tupe Maua &amp; Tupe Faameaalofa mai Fafu</b>	<b>722,962,208</b>	<b>8,306,528</b>	<b>731,268,736</b>
Toese			
<b><u>TUPE ALU I LE TAIMI NEI</u></b>			
Tupe Alu Faale-Tulefono	88,339,342	100,000	88,439,342
Polokalame o Tupe Alu	492,542,095	8,154,543	500,696,638
Tupe Alu Le Fuafuaina	14,776,263	-	14,776,263
<b>Aofai o Tupe Alu</b>	<b>595,657,700</b>	<b>8,254,543</b>	<b>603,912,243</b>
Toese			
<b><u>TUPE ALU I ATINAE</u></b>			
Tupe Alu Faatupe mai Faaunegatupe	73,613,155	-	73,613,155
Tupe Alu Faatupe i Tupe Faameaalofa	122,818,965	-	122,818,965
<b>Aofai Tupe alu i Atinae</b>	<b>196,432,120</b>	<b>-</b>	<b>196,432,120</b>
Aotelega Tupe Pa'ū	(69,127,613)	51,985	(69,075,628)
<b>Faatupeina e:</b>			
Faaunegatupe mamā tului	73,613,155	-	73,613,155
<b>Tinoitupe Tupe Faasili</b>	<b>\$ 4,485,542</b>	<b>\$ 51,985</b>	<b>\$ 4,437,527</b>

#### 5. FAASA'OGA O LOMIGA.

I le maea ai o Tualumaga o Sailiiliga a le Komiti i le Tala Faatatau Faaopoopo Muamua o Tupe mo le Tausaga Faaletupe 2014/2015, na matauina ai se galuega faatino i lalo o le Matagaluega o Tupe e ao ona faasa'oina, mo le silafia ai e le Fono Aoao :-

##### 5.1. MATAGALUEGA O TUPE.

**Itulau 5 - Lomiga Samoa – Tala Faatatau (Estimates).**

Ia soloia le faaupuga “**Faletupe o Atinae o Asia (ADB)**” ma suia i le faaupuga sa’o “**Faletupe o le Lalolagi**” ma faitauina ai le Saofaga a le Malo e faapea:-

**“Saofaga a le Malo i le Faletupe a le Lalogi - \$1,200,000”.**

## 6. **VAAIGA AOA O TETELE I LE TALA FAATATAU FAAOPOOPO MUAMUA (Nu.1) O TUPE 2014/2015.**

### 6.1. **AOTELEGA O TUPE MAUA.**

O le Tala Faatatau Faaopoopo Muamua o Tupe mo le Tausaga Faaletupe 2014/2015, o lo o faamauina ai se aofaiga o Tupe Maua e **\$8,306,528**. O lenei aofaiga e aofia ai le **\$3,772,787** o tupe maua mai i Tiute ma Lafoga o oloa faaulufale mai i totonu o le atunuu sa aoina e le Matagaluega o Tupe Maua, faatasi ai ma se vaegatupe e **\$4,247,741** na maua mai i tupe teu a le Faletupe Tutotonu o Samoa, ma le vaegatupe e **\$286,000** o tupe maua mai i laisene tau fesootaiga sa aoina e le Ofisa o le Pule Faatonu.<sup>1</sup>

### 6.2. **FAAOPOOPOGA I TUPE FAATATAUINA.**

O lo o faamauina i le Tala Faatatau Faaopoopo Muamua o Tupe mo le Tausaga Faaletupe e faaiuina i le aso 30 Iuni 2015, se vaegatupe e **\$10,790,305** o le tuufaatasiga o tupe alu faaopoopo mo polokalame a Matagaluega ma Faalapotopotoga Tumaoti a le Malo. Ua matauina e le Komiti i ana Sailiiliga, o se vaegatupe tele o le tu'uaofaiga atoa o tupe faaopoopo e pei ona faatulai mai e aofia ai le vaegatupe e **\$6,575,636** i lalo o le Tala Faatatau a le Matagaluega o Tupe. O isi vaegatupe e pei ona faatatauina i le Tala Faatatau Faaopoopo Muamua o Tupe, ua fuafuaina lea mo le faatupeina o galuega faatino ma galuega lagolago a nisi o Matagaluega ma Faalapotopotoga Tumaoti a le Malo, mo polokalame faaauau mo le isi ono(6) masina o le afa-mulimuli o le tausaga faaletupe o lo o faagasolo nei.<sup>2</sup>

I lona tuufaatasiga, e 13 Matagaluega ma Faalapotopotoga Tumaoti a le Malo o lo o i ai vaegatupe faaopoopo i le Tala Faatatau Faaopoopo Muamua lenei o Tupe a le Malo mo le Tausaga Faaletupe 2014/2015.

### 6.3. **FAAITIITIGA I TUPE FAATATAUINA.**

O lo o aofia i le Tala Faatatau Faaopoopo Muamua o Tupe 2014/2015 Faaitiitiga o Tupe Faaalu sa faatatauina i le Tala Faatatau Autu o Tupe. Ua matauina e le Komiti e na o le Matagaluega o Tupe o lo o iai se faaitiitiga e **(\$2,635,762)** o tupe alu i polokalame ua toe fetuunai ma siitia atu ia vaegatupe i nisi o Galuega Faatino a lea lava Matagaluega e pei ona faatatauina i le Tala Faatatau Autu o Tupe 2014/2015.

<sup>1</sup> P.P.2014/2015 Nu.157, Tala Faatatau Faaopoopo Muamua(Nu.1) – Itulau III.

<sup>2</sup> Ootootoga o Siitaga i Tupe Totogi – Itulau 4.

## 7. OTOOTOGA O SAILIILIGA & FAUTUAGA.

### 7.1. FAATOAGA & FAIGA FAIVA.

**Tupe Faaopoopo Faatatauina - \$230,926.**

O le aofai o Tupe Faaopoopo ua faatatauina mo le Matagaluega o Faatoaga ma Faiga Faiva e **\$230,926**. I sailiiliga a le Komiti ua matauina ai o lenei vaegatupe ua faatatauina mo le toe faaleleia o le faatatau o le auala mo le nofoaga fou a le Vaega o Lafu manu i Vaea.<sup>3</sup>

Na asia e le Komiti le nofoaga lenei a le Matagaluega i Vaea ma molimauina ai le tulaga faaletonu o le auala taavale o lo o faaaogaina i le taimi nei. E manatu le Komiti o le avanoa lelei lenei e faatino ai e le Matagaluega le fausiaina o se ala-simā mautu faatasi a'o faagasolo ai ma le toe faaleleia o le auala lenei. Na molimauina foi e le Komiti i lana asiasiga le mautu o le nofoaga fou lenei a le Matagaluega e i ai le ofisa autu a le Vaega o Lafumanu faatasi ai ma le fale mautu mo fomai manu ma nofoaga e faatino ai o latou suesuega.

I le maitau a le Komiti, e le talafeagai le fausia o le auala e aunoa ma se ala-simā, o le a le mafai ona faaaogaina lenei auaunaga pe a tafe le alia i taimi o timuga. E manatu le Komiti e tatau foi ona fausia ni alavai e tafe agai iai le vai mo le saogalemu ai o lenei auala o le a fausia. E fautuaina e le Komiti le Matagaluega ina ia toe feutagai ma le Pulega o Felauaiga i le Lauelele e toe tusia se ata fou (revised specifications) i se tau talafeagai mo ia galuega. Afai ae lē gafatia i le seleni e pei ona faatatauina i le Tala Faatatau Faaopoopo lenei, ona faamae'a lea i le Tala Faatatau Autu o Tupe 2015/2016.

Sa fesiligia e le Komiti le tulaga o iai le atinae o lafumanu i totonu o le atunuu ona e tusa ai ma le Lipoti a le Ofisa o Fuainumera Faamauina, o lo o iai se eseesega tele o fuainumera e pei ona faamauina ma molimauina e le Matagaluega o Faatoaga. Na taua e le Pulega o lo o faatinoaina pea le matafaioi a le Pulega ma le Vaega o Lafumanu e fesootai tu'usa'o ma le Aufai-lafumanu mo le faamaoniga o le aofaiga o manu papalagi i totonu o le atunuu. Sa fautuaina e le Komiti le Pulega ina ia faataatia ni faiga faavae fou mo le Aufai-lafumanu ina ia tuuaititia ai le faaaogaina o manu papalagi i faalavelave faale aiga, faale nuu, faale ekalesia, a ia faatino isi auala e pei ona molimauina i isi faalavelave e pei o le ta'iola po o le faatupe.

E manatu le Komiti, pe afai o le a tuuaititia le faalaloina o manu papalagi, o le a faasaoina ma faateleina ai le aofai o manu papalagi i totonu o le atunuu. E le gata i lea ua faamaonia

<sup>3</sup> Tala Faatatau Faaopoopo o Tupe Nu.1 2014/2015 - Itulau 2

foi le taugata o le tau na faatauina mai ai nei manu papalagi mai Ausetalia mo le faamoemoe.

### **FAUTUAGA :-**

E faavae i luga o ana Saililiga, e fautuaina ai e le Komiti le Malo ma le Matagaluega:-

1. **Ia feutagai le Matagaluega o Faatoaga ma le Pulega o Felauaiga i le Laueleele (LTA), ina ia faatinoina le galuega mo le fausiaina o le auala i se tulaga mautu, e le gata ina faataina ai, a ia fausia foi se ala-simā faatasi ai ma alavai ma autu talafeagai i le taimi lava e tasi. O le tuualalo o le Komiti e faatupe uma le fausiana o lea galuega i le taimi e tasi, ae afai e manaomia se tupe faaopoopo (additional cost) ona faaofi lea i le Tala Autu o le Tupe 2015/2016. E taua tele le fausiaina o le alasima mo le saogalemu o tagata faigaluega faapea le mamalu o le atunuu o le a manaomia lenei auaunaga a le Matagaluega i le taimi e louloua ai le tau ma tetele tafega.**
2. **Ia galulue faatasi le Matagaluega o Faataoaga ma le Matagaluega o Fuainumera Faamauina mo se faiga e mafai ai ona faatino le faitau aofai o manu papalagi i totonu o le atunuu. Ua matauina e le Komiti o lo o eseeese faamaumauga a nei Matagaluega ma e taua tele le mautinoa o le aofaiga sa’o o nei atinae.**
3. **E ao i le Matagaluega o Faatoaga ona faataatia se faiga faavae e unaia ai le Aufai lafumanu e faaitiitia le faalaloina o manu papalagi i faalavelave faale-aiga, faale-nuu & faale-ekalesia, a ia tuuina atu se tau (reward) mo le aufai-lafumanu e tausisia faiga faavae mo le faasaoina o manu papalagi.**
4. **E fautuaina le Matagaluega ina ia fesoasoani i le Aufai-lafumanu na o latou tausisia faiga faavae ua taua i luga ma ua faatuputeleina le aofai o manu papalagi, e ao i le Matagaluega ona fesoasoani e fesootai ma faatau mai ia manu papalagi ma toe faatau atu i isi aufai lafumanu o lo o manaomia manu papalagi e amata ai pe faaleleia atili ai o latou atinae.**
5. **Ia faamaonia vaegatupe taitasi e pei ona faatatauina mo le Matagaluega o Faatoaga & Faigafaiva.**

## **7.2. MATAUPU TAU I LE VA I FAFO & FEFAATAUAIGA.**

**Tupe Faaopoopo Faatatauina - \$831,860.**

O tupe faaopoopo mo le Matagaluega o le Va i Fafu ma Fefaatauaiga ua faatatauina mo le toe fetuunaiga o alauni ma faamanuiaga o tagata faigaluega i Ofisa o Samoa i Atunuu i Fafu, faatasi ai ma tupe faaopoopo mo le totogiina o le lisi faapea tupe fa'aalu mo le faagaioiina o le Ofisa a Samoa i Peleseuma.

O le isi vaegatupe e **\$500,000** ua faatatauina mo le polokalame fesoasoani a le Malo mo sikolasipi faa-faiaoga saienisi mo i latou ua agavaa i nei avanoa <sup>4</sup>. E faafetaia e le Komiti le Malo i lana faamuamua ona o lenei agavaa o lo o manaomia tele e le atunuu, e fautuaina ai e le Komiti le Malo ina ia faataatia se faiga faavae faapitoa e totogi ai e le Malo alo ma fanau o lo o naunau pea i avanoa sikolasipi i mataupu faasaienisi mo faailoga o le Postgraduate Degree. E faatauaina e le Komiti nei avanoa mo alo ma fanau o lo o naunau i mataupu faasaienisi lea ona o lo o utiuti nei tomai ma agavaa i totonu o le atunuu.

### **FAUTUAGA :-**

E faavae i luga o ana Sailiiliga, e fautuaina ai e le Komiti le Malo ma le Matagaluega:-

- 1. Ua matauina e le Komiti le faatauua ua ave e le Malo i le mataupu faasaienisi ma le tupe faa-agaga e faatupe ai i le Tala Faatatau Muamua o Tupe. E manatu le Komiti e fautuaina le Malo ina ia fai se faiga faavae faapitoa e faatupeina ai e le Malo avanoa sikolasipi mo i latou o lo o naunau e faaauau aoga mo le faailoga o Postgraduate Degree i mataupu tau saienisi (science). E talitonu le Komiti o le isi lenei agavaa o lo o manaomia tele e le tatou atunuu.**
- 2. Ina ia faamaonia mea taitasi e pei ona faatatauina mo le Matagaluega o Va i Fafu ma Fefaatauaiga.**

### **7.3. TUPE.**

**Tupe Faaopoopo Faatatauina - \$6,575,636.**

O le vaegatupe faaopoopo ua faatatauina mo le Matagaluega o Tupe e **\$6,575,636**, o lo o aofia ai vaegatupe mo galuega tetele e pei o tapenaga amata o le toe fausiaina o le Maota Fonoi a le Palemene lea o lo o faatatauina ai se vaegatupe e **\$500,000**, faatasi ai ma le vaegatupe e **\$110,859** o le sao o le Malo i le toe faaleleia o le malae vaalele i Faleolo. O isi vaegatupe faaopoopo e aofia ai vaegatupe mo le totogiina o lisi ma lafoga faatasi ai ma le totogiina o pili eletise a nisi o Matagaluega ma Faalapotopotoga a le Malo.

<sup>4</sup> Tala Faatatau Faaopoopo o Tupe Nu.1 2014/2015 - Itulau 8.

Ua matauina e le Komiti le tele o galuega faatino a nisi o Matagaluega e le i totogiina i le tele o kamupani tumaoti talu ai lava o le faatamala o le afaigaluega. O nisi o nei galuega faatino ma galuega lagolago sa faataunuaina e aunoa ma le uia o faiga faavae a le Malo e faasino tonu i nei ituaiga auaunaga. E fautuaina e le Komiti le Matagaluega o Tupe ina ia mataitu Matagaluega uma a le Malo ina ia usitaia faiga faavae i le itu tau fefaatauaiga, a aunoa ma le pepa-oka (purchase order P.O.). E fautuaina foi e le Komiti le Matagaluega o Tupe ina ia fesootai i Kamupani Tumaoti (Private Sector) ina ia mautinoa le taulimaina o le pepa oka (PO) ona faatoa mafai lea ona faamatuu atu ni oloa i se Matagaluega. A le tausisia nei faiga faavae o le a le totogiina e le Malo ia oloa.

**7.3.1. FAAITIITIGA I TUPE ALU - (\$2,635,762).**

O le Faaitiitiga o Tupe Faaalu mo le Matagaluega o Tupe e aofia ai se vaegatupe tele e (\$2,580,862) o tupe totoe sa faatatauina mo le fonotaga faava o Malo o Malo Tau Atiae o le Lalolagi (SIDS), faatasi ai ma se vaegatupe e (\$54,000) o totogi o lisi a le Faletupe Tutotonu a Samoa.<sup>5</sup>

**7.3.2. FAUTUAGA:**

E faavae i luga o ana Sailiiliga, e fautuaina ai e le Komiti le Malo ma le Matagaluega:-

1. **Ia unaia ma faamalosia e le Matagaluega o Tupe Matagaluega uma a le Malo ina ia usitaia taiala ma faiga faavae mo fefaatauaiga o oloa (purchase order) mai kamupani tumaoti. Ua matauina e le Komiti o le isi lea faapogai o le faatupulaia o aitalafu tuua a Matagaluega ona o le lē usitaia o faiga faavae mo fefaatauaiga e faafigofie ai foi ona maua faamaumauga e lagolago ai le totogiina o oloa ma so o se auaunaga e faatinoina mo Matagaluega a le Malo.**
2. **E fautuaina le Matagaluega o Tupe ina ia faailoa i Kamupani Tumaoti ma Matagaluega uma a le Malo a lē uia faiga faavae ma faamalosia fefaatauaiga o oloa ma auaunaga**
3. **Ua matauina e le Komiti le tele o le vaegatupe (approximate \$70k monthly) e faaaluina mo le eletise i le Fale a le Malo (TATTE). E fautuaina e le Komiti le Matagaluega o Tupe ina ia faapipiina masini (solar panels) i luga o le Maota e taugofie atu ma faasaoina ai tupe faaalu i le eletise.**
4. **Ina ia faamaonia mea taitasi e pei ona faatatauina mo le Matagaluega o Tupe.**

---

<sup>5</sup> *Tala Faatatau Faaopoopo o Tupe Nu.1 2014/2015 - Itulau 5.*



#### **7.4. FAAMASINOVA & PULEGA TAU FAAMASINOVA.**

**Tupe Faaopoopo Faatatauina - \$395,000.**

O le vaegatupe faaopoopo ua faatatauina mo le Matagaluega o Faamasinoga ma Pulega Tau Faamasinoga e **\$395,000**. O se vaegatupe tele o leni aofaiga e aofia ai le **\$260,870** ua faatatauina lea mo le totogiina o pili eletise tuua a le Matagaluega faatasi ai ma se vaegatupe e **\$95,000** o tupe toe faaola i le vaegatupe o le civil trust. E fautuaina e le Komiti le Matagaluega ina ia mata'itu galuega faatino e ao ona tuuina atu iai vaegatupe e foia ai le toe tulai mai o le faafitauli e pei ona iai le teugatupe o le civil trust.

Sa fautuaina foi e le Komiti le Matagaluega ina ia faapipi'iina ni masini mo le tapueina o le eletise e maua mai le la (solar energy) e faaoga ai le fogafale pito i luga o le nofoaga autu a le Matagaluega i Mulinuu. O leni faamoemoe o le a faasaoina ai tupe faaalu mo pili o le eletise.

#### **FAUTUAGA :-**

E faavae i luga o ana Sailiiliga, e fautuaina ai e le Komiti le Fono Aoao :-

- 1. Ia mataitu lelei e le Matagaluega Galuega Faatino e pei ona iai teugatupe faapitoa (civil trust) e foia ai le toe tulai mai o leni faafitauli i le lumanai;**
- 2. E tatau i le Matagaluega ona fuafua i se taimi vave ona faaoga masini (solar panels) mo le tapu'eina o le eletise e maua mai i le la (solar energy), e tuuitiitia ai tupe faaalu a le Matagaluega mo pili o le eletise;**
- 3. Ina ia faamaonia mea taitasi e pei ona faatatauina mo le Matagaluega o Faamasinoga ma Pulega Tau Faamasinoga.**

#### **7.5. PUNAOA FAANATURA & SIOSIOMAGA.**

**Tupe Faaopoopo Faatatauina - \$921,765.**

O le Tala Taatatau Faaopoopo e **\$921,765** ua faatatauina mo le Matagaluega o Punaoa Faanatura & Siosiomaga o lo o aofia ai se vaegatupe e **\$758,056** ua faatatauina mo galuega faatino ma galuega lagolago mo le fausiaina o taligalu. E tusa ai ma sailiiliga a le Komiti, o leni vaegatupe sa faaaluina mo le fausia ai o taligalu i le afioaga o Lailii faatasi ai ma le fausiaina o taligalu ma alavai i Mulivai Apia.

O le isi vaegatupe i lalo o le Matagaluega o le **\$50,000** mo le totoigiina o konekarate ua maea a nisi o le aufaigaluega ma le vaegatupe e **\$113,708** mo le lafoga totoigi o le VAGST.

## **FAUTUAGA.**

E faavae i luga o Sailiilga, e fautuaina e le Komiti le Malo ma le Matagaluega :-

1. **Ua matauina le afaina o le gataifale o Samoa ona o suiga o le tau ma le sisii pea i luga o le tai. E fautuaina ai e le Komiti le Malo ina ia ave le faamuamua mo fesoasoani i nuu ma afioaga ua matuā afaina o latou gataifale mo le fausiaina o taligalu ma talivai. E fautuaina foi e le Komiti afioaga o lo o eliina faasolitulafono le oneone ona o aafiaga o gataifale, aemaise lava i nofoaga ua maea ona fausia ai taligalu.**
2. **Ia faamaonia mea taitasi uma e pei ona faatulai mai mo le Matagaluega o Punaoa Faanatura ma le Siosiomaga.**

## 7.6. **MATAGALUEGA O LEOLEO.**

**Tupe Faaopoopo Faatatauina - \$636,000.**

O le vaegatupe faaopoopo ua faatatauina mo le Matagaluega o Leoleo e **\$636,000**. O leni vaegatupe faaopoopo mo le Matagaluega e aofia ai se vaegatupe tele e **\$500,000** ua faatatauina mo le totoigi o le fanua o lo o faaogaina mo le polokalame toe fuataina mo tupulaga talavou solitulafono i Olomanu. O le isi vaegatupe e pei ona faatatauina e aofia ai le seleni e **\$108,261** mo le faatupeina o galuega faatino a le Vaega o lo o vaaia taifau, faatasi ai ma le seleni e **\$10,000** mo le totoigiina o Aitalafu tuua a le Matagaluega i nisi o kamupani tumaoti<sup>6</sup>.

Sa fesiligia e le Komiti le Matagaluega e faatatau i le vaegatupe e **\$10,000** ua faatatauina mo aitalafu. Peitai na faailo mai e le Pulega, o le vaegatupe leni e mo le totoigiina o aitalafu tuua a le Matagaluega i nisi o kamupani tumaoti i totonu o le atunuu. Na taua e le Matagaluega, ua silia nei ma le lima tausaga e le i faamaeaina lava ona totoigi nei aitalafu, ma o le auuala ua faatupulaia ai, ona o nisi o nei kamupani sa o latou faamatuina atu oloa i le Matagaluega e aunoa ma le uia o faiga faavae ma taiala ua maea ona faataatitia e le Matagaluega o Tupe. E fautuaina e le Komiti le Matagaluega ina ia aua nei toe tulai mai leni faafitauli i le lumanai. Sa fautuaina foi e le Komiti le Matagaluega o Tupe ina ia silasila totoa i leni tulaga.

<sup>6</sup> *Tala Faatatau Faaopoopo o Tupe Nu.1 2014/2015 - Itulau 15.*

Na afea foi i finagalo faaalua a le Komiti le poloketi a le Matagaluega o lo o faagasolo pea mo le mataituina o taifau taalua i totonu o nofoaga faitele o le taulaga. E fautuaina e le Komiti le Matagaluega ina ia saili fesoasoani le Matagaluega o Leoleo i le Iunivesite Aoao o Samoa i se auala e mafai ai ona fausia mai e le Iunivesite mailei mo le pueina o taifau. Ua fautuaina e le Komiti lena tulaga ona e tusa ai ma le molimau a le Matagaluega, e telē se vaegatupe e faaalua e le Pulega mo le faatauina mai o mailei e faaoga mo le maileina o taifau mai fafo, peitai, e talitonu le Komiti o lo o iai le tomai ma le agavaa e mafai ai ona fausia nei mailei e alo ma fanau o le atunuu o lo o i le matatā eseese a le Iunivesite Aoao a Samoa.

### **FAUTUAGA:**

E faavae i luga o ana Sailiiliga, e fautuaina ai e le Komiti le Malo ma le Matagaluega:-

1. **Ia feutagai le Matagaluega ma le Matagaluega o Tupe i se auala e mafai ai ona totogiina aitalafu tuua o lo o i lalo o le Matagaluega mai tausaga ua tuanai. Ua maua i Sailiiliga a le Komiti, o nei aitalafu ua silia ma le lima(5) tausaga e lē i totogiina lava, ma ua lē talafeagai ai ma faiga faavae a le Malo. E manatu le Komiti e ao lava i le Matagaluega ona totogiina nei aitalafu ona e manaomia foi e Kamupani Tumaoti seleni e faagai ai a latou pisinisi;**
2. **Ia feūtaga'i le Matagaluega ma le Vaega o Matatā Eseese a le Iunivesite Aoao o Samoa i se auala e mafai ai ona maua se fesoasoani e tauala i le fausiaina o mailei e pueina ai taifau ta'aloa. Ua fautuaina e le Komiti lena vaega ona e tusa ai ma le molimau a le Matagaluega, e telē se vaegatupe e fa'aaluina mo le auina mai i fafo o nei mailei, ae o lo o iai le agavaa e mafai ai ona fausiaina nei mailei i totonu o le atunuu.**
3. **Ia faamaonia mea taitasi uma e pei ona faatulai mai mo le Matagaluega o Leoleo.**

### **7.7. FALEPUPI & VAAIA O TAGATA SOLITULAFONO.**

**Tupe Faaopoopo Faatatauina - \$358,922.**

O le vaegatupe faaopoopo ua faatatauina mo le Matagaluega o Tupe Maua e \$358,922 ua faatatauina mo totogi o avanoa faigaluega fou mo le Matagaluega<sup>7</sup>. O nei avanoa e tusa ai

<sup>7</sup> Tala Faatatau Faaopoopo o Tupe Nu.1 2014/2015 - Itulau 22.

ma le molimau a le Komesina o Falepuipui, sa faamaonia e le Kapeneta peitai e lē i aofia i le Tala Faatatau Autu a le Matagaluega. O le tausaga nei ua aloaia ai le faamatuu eseina mai o le Pulega o Falepuipui mai le pulega a le Matagaluega o Leoleo.

Sa fesiligia e le Komiti le Pulega pe ua iai se fuafuaga mo le fausia o se pa e siomia ai le nofoaga a le falepuipui i Tafaigata, peitai sa faaalua manino e le Komesina o Falepuipui ua faamaonia e le Kapeneta le siitia atu o le falepuipui i Tafaigata i lana nofoaga fou i Tanumalala. E fautuaina e le Komiti le Pulega ina ia faatalosagaina le Matagaluega o Tupe mo le faaopoopoina o tagata faigaluega mo le Matagaluega ona o lea ua aloaia le tutoatasi mai le Matagaluega o Leoleo.

### **FAUTUAGA :-**

E faavae i luga o ana Sailiiliga, e fautuaina ai e le Komiti le Malo ina :-

- 1. Ia silasila totoa le Komesina o Falepuipui i nisi auala e atia'e ma faaleleia ai le auaunaga ma le mataituina o falepuipui, a o le'i faasecina atu le nofoaga i Tanumalala e avea ma nofoaga fou mo falepuipui;**
- 2. Ia feutagai le Matagaluega ma le Matagaluega o Faatoaga ma le Faalapotopotoga o le Esetete Tausi i le nofoaga ua faaogaina o le auala i Olomanu.**
- 3. Ia faamaonia mea taitasi e pei ona faatatauina mo le Matagaluega o Falepuipui ma le Vaaia o Tagata Solitulafono.**

### **7.8. FUAINUMERA FAAMAUINA.**

**Tupe Faaopoopo - \$84,596.**

O le tupe faatatauina mo le Pulega o Fuainumera Faamauina o lo o i le Tala Faatatau Faaopoopo Muamua o Tupe 2014/2015 e **\$84,596<sup>8</sup>**. O leni seleni ua faamoemoe mo le faatinoina o sailiiliga a le Matagaluega mo tapenaga o se tusigaigoa e faasino tonu i soifuaga lautele ma le soifua maloloina o tagatanuu o i latou e lē atoatoa le malosia o le tino ma le mafaufau.

Sa fesiligia e le Komiti le Matagaluega mo se auala e mafai ai ona galulue faatasi ma le Matagaluega o Faatoaga ma Faigafaiva ina ia iai se atoaga ma se fuainumera sa'o i le

---

<sup>8</sup> Tala Faatatau Faaopoopo o Tupe Nu.1 2014/2015 - Itulau 21.

faitau aofai o manu papalagi o lo o i totonu o le atunuu. Ua matauina e le Komiti le eseese o le numera ma le faitau aofai o lo o faamauina e nei Matagaluega e lua.

### **FAUTUAGA.**

E faavae i luga o ana Saililiga, e fautuaina ai e le Komiti le Fono Aoao :-

1. **Ia faatinoina polokalame faalauiloa a le Pulega o le Matagaluega o Fuainumera Faamauina (tai 3 masina) mo le silafia e le atunuu lautele tulaga o iai aotelega o faamaumauga aloaia o lo o faamauina e le Matagaluega.**
2. **Ia galulue faatasi le Matagaluega o Fauainumera Faamauina ma Matagaluega a le Malo ma Faalapotopotoga Tumaoti ina ia atoatoa ma sa'o nei faamaumauga. E talitonu le Komiti o nei faamaumauga e matuā taua tele mo faaiuga fai ma fuafuaga alualu mamao mo atinae fai a le Malo mo le manuia o le atunuu.**
3. **Ina ia faamaonia mea taitasi e pei ona faatatauina mo le Pulega o Fuainumera Faamauina.**

### **7.9. FAALAPOTOPOTOGA FAAVAE TAU FATUGAO.**

**Tupe Faaopoopo Faatatauina - \$387,000.**

O le Tala Faatatau Faaopoopo mo le Faalapotopotoga Faavae Tau Fatugao e **\$387,000**. O lenei vaegatupe e tusa ai ma le molimau a le Pulega ua faatatauina mo galuega faatino ma galuega lagolago a le Faalapotopotoga aua le faatotogaina o nisi o masini ma meafaigaluega o lo o fa'aaogaina ma faatinoina ai le auaunaga a le Faalapotopotoga i le atunuu lautele ua aafia i lenei gasegase. Na faailoa mai e le Pulega ina ua fesiligia e le Komiti, ua faamaonia le faatuputupulaia o le mamalu o le atunuu ua aafia i lenei gasegase ma o se tulaga ua faapopoleina ai le Pulega ona o le utiuti o avanoa ma masini e tali atu ai i gasegase ua aafia i latou ua afaina fatuga'o.

Sa maua le avanoa e asia ai e le Komiti le nofoaga autu a le Faalapotopotoga Faavae Tau Fatugao i Motootua. Na molimauina i lea asiasiga a le Komiti le toatele o le mamalu o le atunuu sa autova'a atu i le maota gasegase mo togafitiga. Na faailoa mai foi e le Pule Sili se tasi o faafitauli ua feagai nei ma le Pulea ma ua aafia ai le auaunaga, ona ua tuua e le Alii Fomai sa galue i le Faalapotopotoga Faavae Tau Fatugao mo le vaaia o gasegase faamamā-toto.

Sa fesiligia e le Komiti le Pulega pe lē i talafeagai i le taimi nei ona talosagaina le Malo mo se vaegatupe pe faatupeina mai foi i se fesoasoani mai fafo, ona ofoina mai ni masini ma faapipii nei masini mo le tapueina o le eletise e maua mai i le la (solar energy). Ua fautuaina e le Komiti lea tulaga ona ua matauina i lana asiasiga le tele o masini o lo o fa'aaogaina e le Faalapotopotoga mo togafitiga o gasegase i aso uma o le vaiaso ma o nei masini e anagata ma e tele se vaegatupe e faaaluina mo pili eletise. Na molimauina foi e le Komiti le tulaga faaletonu o le lotoifale i le va i fafo o le nofoaga autu o le Faalapotopotoga Faavae Tau Fatugao i Motootua, ma e fautuaina ai e le Komiti le talosagaina o se isi vaegatupe mo le faamamaina/faaleleia o le fale a le Faalapotopotoga.

### **FAUTUAGA :-**

E faavae i luga o ana Saililiga, e fautuaina ai e le Komiti le Malo ina :-

1. **Ia silasila le Pulega i se auala e mafai ai ona faatino ni polokalame faalauiloa i luga o Televisi, e faamanatu ai i le atunuu lautele aafiaga o le soifua maloloina i le tagofia o le ava malosia ma le taumafa tapaa ona ua faamaonia i suesuega, o le isi lea faapogai o gasegase tau fatugao.**
2. **Ia silasila le Pulega mo le toe faaleleia/faamamaina o le fale aua auaunaga a le Faalapotopotoga Tau Fatugao mo le atunuu lautele.**
3. **Ia sailia se fesoasoani(Donor) e faapipii ai masini (solar panels) e faaoga ai le la mo le eletise moomia aua galuega faatino a le Faalapotopotoga e taugofie mo le agai atu i le lumanai.**
4. **Ia faamaonia mea taitasi e pei ona faatatauina mo le Faalapotopotoga Faavae Tau Fatugao.**

### **7.10. TUPE MAUA.**

**Tupe Faaopoopo Faatatauina - \$387,000.**

O le Tala Faatatau Faaopoopo Muamua o Tupe mo le Tausaga Faaletupe 2012/2013 ua faatatauina mo le Matagaluega o Tupe Maua e **\$387,000**. O lenei vaegatupe ua faatatauina mo le faamaeaina o le Vaega II o le polokalame a le Matagaluega mo le mata'ituina o pisinisi ma kamupani tumaoti. E manatu le Komiti e ao ona silasila le Matagaluega mo se fesoasoani mai fafo mo le faatinoina o lenei polokalame. Na afea i saililiga a le Komiti le tulaga o iai nei le Matagaluega ina ia toe silasila le Malo mo le toe iloiloina o ana Faiga Faavae mo le tuueseeseina ma mavaevae matafaioi a lenei

Matagaluega mo le toe faatumaotiina o le Vaega o Tiute (Boarder Control) ma le Vaega o Lafoga (Income Revenue). E talitonu le Komiti o le a siitia le auaunaga a nei vaega e lua, pe a faatinoina lenei suiga.

Ua matauina foi e le Komiti, i le tuufaatasia o tupe maua mo le Tausaga Faaletupe 2014/2015 sa faamaopoopoina ma tuufaatasia e le Matagaluega o Tupe Maua e **\$3,772,787**. O lenei aofaiga sa mafai ona aoina e le Matagaluega mai tiute ma lafoga o oloa faaulufale mai i totonu o le atunuu. Sa fesiligia e le Komiti le tulaga o iai le aoina o aitalafu ma tupe totogi mo tiute o taavale auina mai i fafo. E manatu le Komiti e tatau lava ona mataitu e le Matagaluega o Tupe Maua lenei tulaga aua le aoina mai o tupe maua mo le Matagaluega. E le gata i lea, o aafiaga o tagata lautle sa faamaonia ia noagatupe.

### **FAUTUAGA :-**

E faavae i luga o ana Saililiga, e fautuaina ai e le Komiti le Fono Aoao :-

- 1. Ia unaia pea e le Matagaluega le totogiina mai o aitalafu tuua a le atunuu lautele i taavale sa faamomoli ma faaulufaleina mai ae e lē i maea ona totogiina tiute;**
- 2. Ia iai se fesootaiga a le Matagaluega ma le Pulega o Felauaiga i Laueleele(LTA) ina ia faamauina i le latou Resitara taavale e le i maea ona totogi tiute ina ia foia ai le faatauina atu i tua ma resitara ai i lea tagata, seia vagana ua maea ona totogi paleni o le tiute o lo o totoe, ona fa'atoā mafai lea ona faatau ese atu ma resitara le taavale i se isi tagata.**
- 3. Ia faamaonia mea taitasi e pei ona faatatauina mo le Matagaluega o Tupe Maua.**

#### **7.11. PULEGA O FELAUAIGA I LE LAUELEELE.**

**Tupe Faaopoopo Faatatauina - \$234,000.**

O le tupe faatatauina mo le Pulega o Felauaiga i le Laueleele o lo o i le Tala Faatatau Faaopoopo Muamua o Tupe 2014/2015 e \$234,000. O lenei seleni ua faatatauina mo le totogiina o le konekarate a se Konesale Faapitoa mo le mataituina o galuega tetele a le Pulega. Sa fesiligia e le Komiti le Pulega i lea auaunaga ma le seleni ua faamatuu atu mo le totogiina o le Konesale Faapitoa lenei, peitai na taua e le Pule Sili, ua maea ona faamaonia le faavaeina o se Vaega Faapitoa i lalo o le Pulega o Felauaiga i le Laueleele e feagai ma le mataituina o Poloketi ma Galuega Tetele.

Sa fesiligia foi e le Komiti le tulaga i le saogalemu o le soifua maloloina o le atunuu ona o aafiaga o afi taavale (air pollution). E faavae le mau a le Komiti ona o lo o matauina pea le feoai lava o taavale ma pasi o lo o puaina atu ai le kasa oona i le vateatea ae ua silia ma le 6 tausaga o auina mai pea fesoasoani tau tupe e auala mai e le Faalapotopotoga Tau Puipuia o le Siosiomaga (ICUN). O lenei polokalame o lo o galulue ai le LTA ma le Matagaluega o Punaoa Faanatura & Siosiomaga(MNRE) ae e leai lava ni fua lelei o aliae mai ai. Sa fesiligia foi e le Komiti tulaga o le saogalemu o tagata feoai i le taulaga ma luga o auala aemaise lava i nofoaga tumutumu i totonu o le taulaga. Sa fautuaina e le Komiti le Pulega ina ia fausia ni mita mo paka o taavale i vaega o le taulaga.

### **FAUTUAGA :-**

E faavae i luga o ana Sailiiliga, e fautuaina ai e le Komiti le Fono Aoao :-

1. **Ia faamalosia e le Pulega aiaiga o le Tulafono e taofia ai taavale o lo o faaaogaina alatetele a le Malo ae le o ausia tulaga lelei o a latou afi lea o lo o puaina atu le kasa oona i le vateatea. Talu ai o lo o faatupeina mai e le Faalapotopotoga (IUCN) i lana faigapaaga ma le LTA ma le MNRE le faatinoina o le polokalame e aveesea ai le asu mai taavale ma tausisia ai feagaiga faava o Malo.**
2. **Tatau i le Pulega o Felauaiga i le Lauelele ona saili auala e mafai ai ona tumaoti (self-sufficient) e aunoa ma le toe faalagolago i tupe mai le Malo i totonu o le lima(5) tausaga e afua atu ia Iulai 2015, seia vagana ai poloketi tetele o lo o faatupeina mai Paaga mai fafo. O se tasi o ia auala e manatu le Komiti ua tatau loa ona faamitaina o auala tetele a le Malo i le taulaga (user-pay system) e saili ai ana tupe maua. O lea faamoemoe o le a aoga tele mo kamupani o lo o moomia paka i luma o a latou lava pisinisi mo tagata faatau (customers), o le a aoga foi lea e mafaufau atili ai le au fai taavale mo le faaaogaina o pasi(public transport) ma le soona tumu vale o taavale i auala tetele i totonu o le taulaga.**
3. **Ua matauina e le Komiti le tele o vaega o auala i le taulaga e le o saogalemu i tagata feoai aemaise lava i nofoaga nei:-**
  1. **nofoaga a le NPF (Plaza), ma le Flea maketi/DBS.**
  2. **auala kolosi i le va o le ANZ Bank/Chan Mow ma le Maota o le Malo (FMFM II) / Central Bank;**

**E manatu le Komiti e iai auala e mafai ai ona faatupe e le Malo (LTA) i ana tupe maua masani, po o le faaaoga o faiga paaga ma pisinisi Tumaoti (Public Private Partnership (PPP). O tau mo le fausiaina o nei galuega e mafai ona toe faaola mai i faiga paaga nei ma pisinisi tumaoti e tauala i faasalalauga faapisinisi i totonu o le 5 tausaga.**



4. Ia faia se Tulafono e puipuia ai taavale ma tagata feoi i auala mai moaga vao ma so o se galuega faatino e faia i luga o auala.
5. E faamanatu atu e le Komiti i le Pulega o Felauaiga i le Lauelele(LTA) ma le Matagaluega o Leoleo le faamalosi o tulafono o le faaogaina o alatetele a le Malo e pasi ma taavale(taxis) mo le usitaia lea o faasino-ala ma nofoaga faapitoa/faatali pasi(bus stops) ma nofoaga faapitoa (taxi-stands) e aunoa ma paka faatulafonoina mo pasese i so o se vaega o ala tetele a le Malo.
6. Ia faamaonia mea taitasi e pei ona faatatauina mo le Pulega o Felauaiga i luga o le Lauelele.

#### 7.12. **FAALAPOTOPOTOGA O SUESUEGA FAASAIENISI.**

**Tupe Faaopoopo Faatatauina - \$34,000.**

O le vaegatupe faaopoopo mo le Faalapototoga o Suesuega Faasaienisi a Samoa ua faatatauina mo le tologiina o galuega faatino a Faatonu o le Faalapotopotoga. Sa fesiligia e le Komiti tulaga ua iai oloa ua maea ona faatino ai suesuega a le Faalapotopotoga e pei o le falaoamata e gaosi mai le ulu ma isi. Na taua e le Pulega ua maea ona faamaonia le lelei atoatoa (quality) o nei oloa mo le fofoga taumafa a le atunuu, ma o lo o taumafai lava i le taimi nei feutagaina ma Kamupani Tumaoti mo le maketiina atu i fafo o a tatou oloa nei.

#### **FAUTUAGA :-**

E faavae i luga o ana Sailiiliga, e fautuaina ai e le Komiti le Fono Aoao :-

1. Ia faalauiloa ma unaia atili e le Faalapotopotoga oloa ua maea ona suesueina i kamupani tumaoti (private sector) aua lava le maketiina atu i fafo ma maua ai faamanuiaga tau seleni e le gata mo le tamaoaiga o le atunuu, ae manuia ai foi o tatou tagata o lo o galueaina ia atinae. Ua maitauina e le Komiti ua fai si leva ona maea ona faamaonia atiae o oloa e pei ole falaoamata mai le ulu, suauu popo (biodiesel), suau'u mai le avoka (cooking oil), ae e leai lava se Tagata faipisinisi po o se kamupani Tumaoti ua faaali so latou manao mo le atinaeina o nei oloa. O le tuualalo a le Komiti, ia amata-mea loa le Malo e faatino polokalame e atinae ai se tasi o nei oloa e le gata e maua i galuega a o tatou tagata ae faapea foi avanoa tau maketi mo le aufai-faatoaga. O le isi foi aoga o nei pisinisi, o le a faaitiitia ai le faalagolago i oloa mai fafo o le a faasaoina ai tupe faaagaga mo fefaatauaiga.

2. **Ia faamaonia mea taitasi e pei ona faatatauina mo le Faalapotopotoga o Suesuega Faasaienisi a Samoa.**

8. **IUGAFONO:**

I le maea o ana Iloiloga, ua faaiugafonoina ai e le Komiti e fautuaina le Fono Aoao :-

**Ina ia faamaonia le P.P.2014/2015 Nu.157, Tala Faatatau Faaopoopo Muamua o Tupe Maua ma Tupe Totogi o le Malo o Samoa mo le Tausaga Faaletupe Faaiuina aso 30 Iuni 2015, faatasi ai ma Faasaoga o Lomiga.**

**PEPA FAAPIPII – 1.****1. FESOASOANI (Tulafono Tumau 156).**

A o faagasolo sailiiliga a le Komiti, na tuuina mai le fesoasoani a Faauluuluga o Matagaluega, Ofisa Sili Lagolago o Pulega ma Ofisa Sinia nei :-

**MATAGALUEGA O TUPE.**

Tupaimatuna Iulai Lavea	-	Ofisa Sili o Pulega
Soane Leota	-	Ofisa Sili Lagolago o Pulega ( <i>Vaega o Pulega</i> )
Abbycail Lee Hang	-	Ofisa Sili Lagolago o Pulega ( <i>Tala Faatatau o Tupe</i> )
Relina Stowers	-	Ofisa Autu o Pulega

**OFISA - PULE MA SUETUSI SILI.**

Fuimaono Camillo Afele	-	Pule & Suetusi Sili
Lauano Dennis Chan Tung	-	Pule & Suetusi Sili Lagolago

**KOMISI E PULEA TAGATA FAIGALUEGA A LE MALO.**

Salilo Tavita - Magraff	-	Ofisa Sili Lagolago o Pulega
Makerita Tiotio	-	Ofisa Sili Lagolago o Pulega

**2. MOLIMAU :**

Na fofogaina e le Komiti faamatalaga molimau sa tuuina mai e Sui o Matagaluega taitasi ua taua i lalo:-

**1. FAATOAGA & FAIGAFIIVA.**

Fonoiva Sealiitu Sesega	-	Ofisa Sili o Pulega
Lene Fau	-	Ofisa Sili Lagolago o Pulega ( <i>Vaega o Pulega</i> )

Leota L Pelesa	-	Ofisa Sili Lagolago o Pulega ( <i>Vaega o Lafumanu</i> )
Lupemanu Pelenato Fonoti	-	Ofisa Sili Lagolago o Pulega ( <i>Vaega o Fa'aasu</i> )
Joyce S Ah Leong	-	Ofisa Sili Lagolago o Pulega ( <i>Vaega o Faiga Faiva</i> )
Lafaele Enoka	-	Ofisa Sili Lagolago o Pulega ( <i>Vaega Poloketi – SACEP</i> )

## 2. **VA IFAFO & FEFAATAUAIGA.**

Aiono Mose Sua	-	Ofisa Sili o Pulega
Palepa Amosa	-	Ofisa Sili Lagolago o Pulega ( <i>Vaega o Pulega</i> )
Sharon Potoi-Aiafi	-	Ofisa Sili Lagolago o Pulega ( <i>Vaega o Sikolasipi</i> )

## 3. **TUPE.**

Tupaimatuna Iulai Lavea	-	Ofisa Sili o Pulega
Soane Leota	-	Ofisa Sili Lagolago o Pulega

## 4. **FAAMASINOGA & PULEGA TAU FAAMASINOGA.**

Lio Heinrich W Siemsen	-	Sui Ofisa Sili o Pulega
Alofipo N Faletolu Lofipo	-	Ofisa Sili Lagolago o Pulega
Faagutu Samuelu – Vaalotu	-	Ofisa Sili Lagolago o Pulega
Leota Pelenato Paulo	-	Ofisa Sili Lagolago o Pulega
Serah Skelton – Sokini	-	Ofisa Sili Lagolago o Pulega

## 5. **PUNAOA FAANATURA & SIOSIOMAGA.**

Suluimalo Amataga Penaia	-	Ofisa Sili o Pulega
Ailepata Manila	-	Ofisa Autu ( <i>Vaega o Pulega</i> )

**6. TUPE MAUA.**

Pitolau Lusua Sefo-Leau	-	Ofisa Sili o Pulega
Perevise T Puna	-	Ofisa Sili Lagolago o Pulega ( <i>Vaega o Pulega</i> )
Paulo Chang Wai	-	Ofisa Sili Lagolago o Pulega ( <i>Vaega o Tupe Maua</i> )

**7. FAALAPOTOPOTOGA FAAVAE TAU FATUGAO.**

Mulipola Hazelman	-	Pule Sili
Alvin Magraff	-	Pule Sili Lagolago ( <i>Vaega o Pulega</i> )

**8. FUAINUMERA FAAMAUINA.**

Muagututia Sefuiva Reupena	-	Ofisa Sili o Pulega
Nerise Leilua	-	Ofisa Autu ( <i>Vaega o Pulega</i> )
Taiaopo Faumuina	-	Ofisa Autu ( <i>Vaega o Fuanumera Faamauina</i> )
Fiapata Lino	-	Ofisa Autu ( <i>Vaega o Tagata Faigaluega</i> )
Junior Ah Yen	-	Ofisa Autu ( <i>Vaega o Faitauga Aloaia</i> )

**9. MATAGALUEGA O LEOLEO.**

Afamasaga Michael Soonalole	-	Sui Komesina
Fauono Talalelei Tapu	-	Komesina Lagolago
Nafaitoa Talaimanu Ketu	-	Komesina Lagolago
Angela Nynette A Enosa	-	Pule – Vaega o Pulega

**10. FALEPUIPUI & VAAIA O TAGATA SOLITULAFONO**

Taito Saua - Komesina

**11. FAALAPOTOPOTOGA O SUESUEGA FAASAIENISI A SAMOA.**

Tilafono Leatiogie David Hunter - Ofisa Sili o Pulega

**12. PULEGA O FELAUAIGA I LE LAUELEELE.**

Leasi John Galuvao - Pule Sili.

**3. IUGAFONO:**

I le maea o ana Iloiloga, ua faaiugafonoina ai e le Komiti e fautuaina le Fono Aoao :-

**Ina ia faamaonia le P.P.2014/2015 Nu.157, Tala Faatatau Faaopoopo Muamua o Tupe Maua ma Tupe Totogi o le Malo o Samoa mo le Tausaga Faaletupe Faaiuina aso 30 Iuni 2015, faatasi ai ma Faasaoga o Lomiga.**

**Hon PAPALIITELE Niko Lee Hang.  
Taitaifono**

**TAFUA Maluelue Tafua  
Sui Taitaifono.**

**Hon PALUSALUE Faapo II  
Sui Usufono**

**Hon FAUMUINA Tiatia Faaolatane Liuga  
Sui Usufono**

**LEALAILEPULE Rimoni Aiafi  
Sui Usufono**

**AFUALO Wood Uti Salele  
Sui Usufono**

**TIALAVEA F T Seigafolava  
Sui Usufono**

**TAEFU Lemi Taefu  
Sui Usufono**